

॥ भद्र-सूक्तम् ॥

कौत्सः

भद्रो नो अग्निः सुहवो विभावसुर् भद्र इन्द्रः पुरुहूतः पुरुष्टुतः ।
भद्रः सूर्य उरुचक्षा उरुव्यचा भद्रश् चन्द्रमाः समिथेषु जागृविः ॥१॥

भद्रः प्रजा अजनयन्नः प्रजापतिर् भद्रः सोमः पावमानो वृषा हरिः ।
भद्रस् त्वष्टा विदधद् रूपाण्य् अद्भुतो भद्रो नो धाता वरिवस्यतु प्रजाः ॥२॥

भद्रस् ताक्ष्यः सुप्रजस्त्वाय नो महौ अरिष्टनेमिः पृतना युधा जयन् ।
भद्रो वायुर् मातरिश्वा नियुत्पतिर् वेनो गयस्फान उशन् सदा ऽस्तु नः ॥३॥

भद्रो मित्रो वरुणो रुद्र इद् वृधा भद्रो ऽहिर्बुध्न्यो भुवनस्य रक्षिता ।
भद्रो नो वास्तोष्पतिर् अस्त्वं अमीवहा भद्रः क्षेत्रस्य पतिर् विचर्षणिः ॥४॥

भद्रो विभुर् विश्वकर्मा बृहस्पतिर् भद्रो द्विषस्तपनो ब्रह्मणस्पतिः ।
भद्रः सुपर्णो अरुणो मरुत्-सखा भद्रो नो वातो अभिवातु भेषजी ॥५॥

भद्रो दधिक्रा वृषभः कनिक्रदद् भद्रः पर्जन्यो बहुधा विराजति ।
भद्रा सरस्वाँ उत नः सरस्वती भद्रो वशी भद्र इन्द्रः पुरुरवः ॥६॥

भद्रो नः पूषा सविता यमो भगो भद्रो ऽग्रज एकपाद् अर्यमा मनुः ।
भद्रो विष्णुर् उरुगायो वृषाहरिर् भद्रो विवस्वाँ अभिवातु नस्त्मना ॥७॥

भद्रा गायत्री ककुब् उष्णिहा विराड् भद्रानुष्टुप् बृहती पङ्क्तिर् अस्तु नः ।

भद्रा नस् त्रिष्टुब् जगती पुरुप्रिया भद्रातिच्छान्दा बहुधा विभूवरी ॥८॥

भद्रा नो राकानुमतिः कुहूः सुहृद् भद्रा सिनीवाल्स्य अदितिर् मही ध्रुवा ।
भद्रा नो द्यौर् अन्तरिक्षं मयस्करं भद्रो ऽश्वो दक्षस्तनयाय नस् तुजे ॥९॥

भद्रो नः प्राणः सुमनाः सुवागसद् भद्रो अपानः सतनुः सहात्मना ।
भद्रं चक्षुर् भद्रम् इच्छोत्रम् अस्तु नो भद्रं न आयुः शरदो असच्छताम् ॥१०॥

भद्रेन्द्राग्नी नो भवताम् ऋतावृधा भद्रा नो मित्रावरुणा धृतव्रता ।
भद्राश्विना नो भवतां नवेदसा भद्रा द्यावा-पृथिवी विश्व-शंभुवा ॥११॥

भद्रा न इन्द्रावरुणा रिशादसा भद्रा न इन्द्रा भवतां बृहस्पती ।
भद्रेन्द्राविष्णू सवनेषु यावृधा भद्रेन्द्रासोमा युधि दस्यु-हन्तमा ॥१२॥

भद्राग्नाविष्णू विदधस्य प्रसाधना भद्रा नो ऽग्नीन्द्रा वृषभा-दिवस्पती ।
भद्रा नो अग्नीवरुणा प्रचेतसा भद्राग्नीषोमा भवता नवेदसा ॥१३॥

भद्रा सूर्या-चन्द्रमसा कविक्रतू भद्रा सोमा भवतां पूषणा नः ।
भद्रेन्द्रावायू पृतनासु-सासही भद्रा सूर्याग्नी अजिता धनञ्जया ॥१४॥

भद्रा नः सन्तु वसवो वसुप्रजा भद्रा रुद्रा वृत्रहणा पुरन्धरा ।
भद्रा आदित्याः सुपसः सुनीतयो भद्रा राजानो मरुतो विरप्सिनः ॥१५॥

भद्रा न ऊमा सुहवाः शतश्रियो विश्वेदेवा मनवश् चर्षणीधृतः ।
भद्राः साध्या अभिभवः सूरचक्षसो भद्रा नः सन्तु ऋभवो रत्न-धातमाः ॥१६॥

भद्राः सर्वे वाजिनो वाजसातयो भद्रा ऋषयः पितरो गभस्तयः ।
भद्रा भृगवो ऽङ्गिरसः सुदानवो भद्रा गन्धर्वाप्सरसः सुदंशसः ॥१७॥

भद्रा आपः शुचयो विश्वभृत्तमा भद्राः शिवा यक्ष्मनुदो न ओषधीः ।
भद्रा गावः सुरभयो वयोवृधो भद्रा योषा उशतीर् देवपत्यः ॥१९॥

भद्राणि सामानि सदा भवन्तु नो भद्रा अथर्वाण ऋचो यजूंषि नः ।
भद्रा नक्षत्राणि शिवानि विश्वा भद्रा आशा अहुताः सन्तु नो हृदि ॥२०॥

संवत्सरा न ऋतवो मयोभुवो यो वा आयुवाः सुसराण्य् उत क्षपाः ।
मुहूर्ताः काष्ठाः प्रदिशो दिशश् च सदा भद्रा सन्तु द्विपदे शं चतुष्पदे ॥२१॥

भद्रं पश्येम प्रचरेम भद्रं भद्रं वदेम शृणुयाम भद्रम् ।
तन्नो मित्रो वरुणो मा महन्ताम् अदितिः सिन्धुः पृथिवी उत द्यौः ॥२२॥